

添聘教員 ○河南省巡警擬添教員已於十四日聘到北洋巡警學堂畢業員劉啟宇來汴承乏

豫撫閱工 ○豫撫張安帥出城閱八廳工程到黃河時並座搖車細閱黃河橋工後到各廳驗工聞所到各處門包等費均不准收酒席等均命從儉供應約二十外可以回省

威海衛舉行慶賀立憲會補記 ○七月念一日威海衛華民舉行慶祝立憲大會紳商士庶齊集劉公島並備有華商興昌號小火輪高懸國徽併五彩旗幟往來迎送所有島上及碼頭威海衛城內華商舖面均一律高挂龍旗張燈結綵燃放鞭炮同中慶祝其時發起人史流芳陳楚卿沈培鄴朱慶章李覺民各鈞信及各紳商並合攝小影以爲紀念嗣又公電北京澤公及各憲政大臣略謂我威海衛雖隸英界究屬我國疆土其盼將來我國恢復海軍倚爲根據此合衛商學界人等今日特開慶祝大會預賀立憲前途同盡國民義務威海衛商界學界同人公電云

工藝暢銷 ○廣東嘉應州工藝廠所織各土布日漸進步價廉質美與近日新出之白布烏布斜文布印花布等價僅數分故銷路甚旺各學堂亦多購置操衣甚適於用云

批斥抽稅開辦絲式改良所 ○山東青州蠶桑畢業生房星耀以上年赴東調查本年回國現擬在周村設立絲式改良所按斤抽稅具稟商務局奉批周村絲市已有應納稅厘所議每斤抽稅京錢四十文一節跡近擾民應不准理

衍聖公太夫人東旋 ○衍聖公太夫人前因清理口外荒地於夏間晉京早誌前報近聞初八日下午已由京乘包車抵津換坐官舫即回山東原籍

上游安瀾 ○山東黃河上游楊工舊口月前忽出險工衝毀民埝數次嗣因風勢轉歛水勢亦稍退吳令士劍乘隙堵禦大隄幸得無事今伏汛已過隄工修固當不復有他虞吳令業於日前回省銷差

牌示肄業法政 ○粵督岑雲帥以法政學堂爲造就吏才之地前經札司轉飭本省候補人員前赴報名考取入堂肄業乃規避推諉人數寥寥不滿學額殊非建設本意現奉 明詔頒發立憲制度一切地方政治更須預備斷非不學之躬所能出而治事特又牌示本省候補人員如係有志向學無論會否考過均准到堂報名候期收考廣爲錄取以符學額本部堂將以此驗各員之學識并以規各員之志趣幸勿自甘暴棄致誤前途再嗣後所有到省人員無論何項班次均須先赴法政學堂肄業庶陶鑄歸於一途而吏治不至淆雜究應如何安定章程即由藩司會同學司詳細擬議專案詳核施行

旗營認真教練步炮隊 ○廣州將軍壽留守蔭以迭接京中來文飭令整頓八旗營務因先分派多人撥往粵省新軍隨同學習日來又會同都統諸大員將旗營大加整頓並調回各旗營預備教練步炮各隊聞一切編隊法均仿照粵省新軍辦理云

煤礦將歸官辦 ○廣東南海石塘鄉大嶺山煤產甚旺惟因鄉民瀾於風水迭有人前往開掘平因阻梗中止近日善後局已查得此礦苗產絕佳可供數十年之用經派委員前往詳細查勘擬購機器開往開採矣

組織女界保學會 ○粵省現有謝女士等數人聯合同志組織兩粵女界保學會其宗旨無論會內會外凡有破壞學界者則合羣力糾正之其有益學界者則合羣力贊成之已擬就規條具稟學務公所立案開辦

暴風損害菓園 ○粵城自本月中旬來暴風疾雨致附近火車頭石圍塘地方楊桃沙梨各菓園菓木被風損害甚多

籌還煤款 ○閩關銅幣局停鑄銅元已久惟該局前曾購用萍礦焦炭若干噸計值銀四千一百四十兩迄未解還當經湖北鐵廠督辦迭次咨催崇佑帥飭局籌還現聞此款已由該局馬提調如數撥匯歸還以清帳目矣

選派學生出洋 ○閩省現又選派學生四十二名前往東洋插班學習速成師範計六個月卒業不日即束裝就道

札飭照解購馬費 ○江督札江甯藩司略謂准出使德國大臣楊電開據倪謙稟稱因馬病廢暫停功課大操需馬甚急乞電請購馬款一千五百馬克祈示遵等因到本署部堂准此除電復照匯並行督練公所外合行抄電札司遵照趕速如數匯解具報

撫批不得干預 ○湘省禹之模被拿已紀前報茲悉有教堂牧師致函當道並具稟撫轅欲爲保出奉撫批示轅門略謂該匪聚眾哄堂塞署自無法紀咎由自取罪無可逭前有學生稟保亦未批准該牧師不得妄行干與云

湘省擬設電燈 ○湘省自新銅元局開設之後各廠夜工悉用電燈價廉工省光明勝常惟該局遠在南門以外曾經提議將燈線引接入城繼經考查因電機甚小不能擴充而止茲由城中各巨紳擬共籌集公款製辦電機必得供三萬盞之用並擬開一演說大會得多人認可且能代購燈頭之數辦理始有把握聞日來款項已定有多數必可有成將來須在上海延聘工師辦購機器也

甘令接印 ○甘泉縣宋大令康恒因案撤任接署是缺之震再亭大令鈞已於廿二日蒞揚隨赴運轅府署稟到一面頒發紅諭定於二十四日接印

開辦女學 ○揚郡新城丁家灣幼女學堂前經舉人李約等糾集同志籌款創辦專習女工文字並延聘女教習駐堂督課已奉學務處司道批准頒發文告實貼該堂門首一面札飭江甘兩縣保護毋許棍徒滋擾大約中秋後即可開辦矣

積穀贏餘 ○江陰積穀四倉九千餘石除西鄉十鎮東南鄉四鎮廿八年未領平糶此時補給二千餘石外尚有七千石係前董陳某經手東倉五千石係去歲經董張某措辦前月廿八日平糶各鄉鎮均赴城領取照例每石九五折嗣恐蟲傷鼠耗不敷原額爰以九二折給付後計東倉存餘一百六十八石西倉存餘五百六十四石零八分東倉所餘按照四十鎮分派西倉所餘歸城內暨西外南北外按田之多寡分派迨裝運售消糶米分布覆秤時又餘四千餘石各經董本擬月底停局此時多糶金一千三百餘元又可展期數日矣

江令兼辦營務 ○江陰係長江門戶標炮雷水師各營紛集軍民雜處往往生事地方遇有交涉移文往來頗費周折故現奉江督札飭該縣承大令爲營務處

洞庭盜熾續誌 ○本月廿一夜洞庭東山席姓家被搶已紀前報茲聞是晚約三更時突來盜匪十餘人明火執仗奪門而入席姓主婦適不在家盜以刀橫女傭之項勒令指點藏儲銀洋之所搜括一空至天明始去約失銀錢衣飾等物不下千金事後據女傭云中有一盜異鄉口音面貌甚熟常至對門典當當舖出入時有見之則此案不難緝獲特恐官斯土者專顧自己考成諱盜爲竊益令若輩明目張膽肆行搶掠不知該處分府協鎮果能嚴密緝拿以保衛閭閻否也